

Source: Berita Harian, Page 1  
Date: 10 April 2024

## Raya diketepi dulu kerana perlu jalani pembedahan tumor otak sehari sebelum Lebaran

► ANWAR SALEH  
anwarsaleh@sph.com.sg

Sedang ramai orang sibuk membuat persiapan menyambut ketibaan Hari Raya Aidilfitri, Encik Fazli Nasser, 39 tahun, terpaksa menunda segala persiapan kerana harus menjalani pembedahan di hospital.

Pada 9 April, sehari sebelum Hari Raya Aidilfitri, bapa tiga anak kecil itu menjalani pembedahan untuk membuang satu tumor barah yang tumbuh di bahagian otaknya.

Malah, pembedahan itu juga dipalit risiko hilang penglihatannya.

Ketika ditemui *Berita Harian* (BH) di flat sewanya di Jurong West beberapa hari sebelum pembedahannya, Encik Fazli kelihatan bimbang dan sedih tidak dapat menyambut Hari Raya Aidilfitri bersama isteri dan anak-anaknya pada 1 Syawal.

"Saya sudah belikan baju Hari Raya untuk anak-anak saya.

"Memandangkan saya akan menjalani pembedahan ini, saya harap saya akan cepat pulih, jadi boleh sempat menyambut Raya pada Syawal.

"Saya mahu cepat-cepat jalani pembedahan ini supaya saya dapat mulakan lembaran baru pada Syawal bersama keluarga saya," kata Encik Fazli.

Pada 2020, Encik Fazli disahkan menghidap penyakit chordoma, sejenis barah tulang yang jarang ditemui. Ia boleh berlaku di tulang belakang atau pangkal tengkorak.

Bagi Encik Fazli, ia bermula dengan simptom tidak dapat menggerakkan bola mata kirinya dengan bebas dan merasakan sensasi luar biasa di sebelah kiri mukanya.

Pada mulanya, beliau menyangka dirinya sedang mengalami simptom angin ahmar.

Beliau bergeser ke Jabatan Kemalangan dan Kecemasan (A&E) Hospital Universiti Nasional (NUH) untuk diperiksa.



Encik Fazli Nasser tidak dapat menyambut Hari Raya Aidilfitri pada 1 Syawal kerana terpaksa menjalani pembedahan untuk membuang tumor barah yang tumbuh di bahagian otaknya. Bersamanya adalah isterinya, Cik Mayang Sari, dan anak-anaknya, Sofia Aamal (berbaju merah jambu) dan Yusuf Ilham. - Foto BH oleh KHALID BABA

Setelah beberapa ujian, termasuk menjalani imbasan tomografi berkomputer (CT Scan), doktor memberitahunya bahawa beliau mempunyai tumor di bahagian otaknya.

Pembedahan pada 9 April adalah pembedahan ketiga Encik Fazli untuk membuang bahagian tumornya yang telah menjadi keras.

Meskipun dibelunggu dengan ketidak-tentuan, beliau tidak ingin menunjukkan sebarang kebimbangan terhadap ketiga-tiga anaknya - Yusuf Ilham, tujuh tahun; Sofia Aamal, enam tahun; dan Noah Ilham, tiga tahun.

Baginya, mereka terlalu kecil untuk memahami keadaan yang dialami ayah mereka itu.

Isterinya, Cik Mayang Sari, 31 tahun, merupakan tulang belakangnya yang telah

banyak menyokongnya sebagai suri rumah untuk menjaga anak-anaknya.

Encik Fazli berkata pada mulanya beliau merancang menyambut Hari Raya seperti biasa pada 1 Syawal, tetapi apabila diberitahu bahawa tarikh terawal untuk pembedahannya jatuh pada 9 April, beliau tidak mahu menundanya.

Buat masa ini, beliau berkata penyakit itu masih belum menjejaskan keupayaannya bekerja atau berinteraksi, tetapi boleh menjejaskan wajah serta penglihatannya jika tidak menjalani rawatan.

Bercakap dengan *BH*, Encik Fazli berkata beliau bimbang kerana jika apa-apa yang berlaku, ia akan menjejaskan keluarganya memandangkan beliau adalah pencari nafkah tunggal.

Menurut doktorinya, Penolong Profesor Vincent Nga, chordoma jarang berlaku, dengan kira-kira satu kes yang didiagnosis bagi setiap juta orang di serata dunia.

Dr Nga merupakan Ketua dan Konsultan Kanan di Institut Tulang Belakang Universiti Nasional di Sistem Kesihatan Universiti Nasional (NUHS).

Pada Jun 2020, Encik Fazli menjalani pembedahan pertamanya di NUH untuk membuang tumor yang berada di tulang pangkal tengkoraknya.

Pada Mac 2023, beliau menjalani kraniotomi, sebuah prosedur untuk memotong dan mengeluarkan sementara sekeping tulang tengkorak untuk mengakses otak, untuk membuang lebih banyak tumor yang telah tumbuh semula.

Pada 9 April, Encik Fazli menjalani satu lagi kraniotomi di Hospital Tan Tock Seng (TTSH) untuk membuang sebahagian tumor yang berhampiran dengan saraf optiknya.

■ Tabah sambut Lebaran  
- Muka 7-11